



GIUSEPPE CABIZZOSU

BIBLIOTECA

www.giuseppecabizzosu.it

Gavino Achenà

(Ozieri 17?? - 1829)

Poesie scelte in lingua sarda

Indice

Cenni biografici	5
Bois chi podere tantu	6
Tancas serradas a muru	9
Troppu ingratu peccatore	10

Cenni biografici

Fra Gavino. Di Ozieri. Missionario dell'ordine dei cappuccini, autore di numerose canzonette spirituali, morì molto vecchio nel 1829.

Bois chi podere tantu

Bois chi podere tantu
tenides cun su Signore
non siedas protettore,
Michel'Arcangelu santu.
Tenzende su prinzipadu
in d'ogn'alta gerarchia,
tenzende sa primassia
de capitanu honoradu
dezis esser iscultadu
dae Deus cun amore.
In grassias bos sublimesit
dai cuddu prim'istante
chi unu Deus amante
s'esistenza bos desit,
tand'est chi bos nominesit
d'anghelos su direttore.
Cun issos bos apponzezis
a Lusbel s'oppositore
chi emulare su Signore
de superbu lu mirezis:
«Chi' est che Deus» li nezis
«s'altissimu criadore?».
A zelestiale gloria
triumfezis cun impignu,
deponzezis su malignu
cunsighezis sa vittoria,
trofeu chi pro memoria,
bos giamat triumfadore.
A bois tot'invocamus
in sa valle chi vivimus,
seguros chi consighimus
sas grassias chi dimandamus;
oh felizes si logramus
s'impignu bostru et favore!
Sos humiles difendide,
meda sos castos amade,
innozzentes amparade,
sos viventes dirigide,
moribundos assistide,
movide su peccadore.
De ogn'anima eleggida
nde sezis su direttore,
bos zelebrat difensore
sa santa Ecclesia unida,
bos hant bidu in custa vida

ispessiale imbasciadore.
Proteggide ancora a nois,
mortales angustiadados,
chi vivimus molestados
in d'unu mare de ohis
invochende totu a bois
pro nostru liberadore.
Siedas flagellu armadu
contra sa barbara zente
et mustradeli comentu
benzat s'homine salvadu,
et de s'errore abbrazzadu
nde siat detestadore.
Sos pobulos cristianos
sutta sas alas tenide
et sempre los proteggide
dai sas barbaras manos,
de sos crudeles tiranos
siedas su percussore.
De perigulos de mare,
de fame, peste et guerra,
de limbas malas in terra
nos potedas liberare
et bos demus acclamare
portentosu operadore.
Cun podere interzedide,
animade disperados,
proteggide angustiadados,
sos oppressos difendide
et pro totu cumparide
de grassias dispensadore.
Siedas guardia et ghia
de sos poveros tentados,
a sos tristos affannados
su cunfortu et cumpagnia,
direttore in ogni via
et fidele amparadore.
De inzendios de fogu,
dai ogni tempestade,
controversia, inamistade,
dae proibidu giogu
difendide custu logu,
siedas preservadore.
Cun s'iscudu poderosu
totu nois difendide
et cun s'ispada faghide
ogni fidele animosu
pro esser vittoriosu

a Satanas traitore.
De sas grassias aumentu
a sos giustos impetrade,
a sos peccadores dade
su veru arrepentimentu,
et chi vivant de assentu
pianghende pro dolore.
Sa superbia esiliade
et humiles nos faghide,
a s'avaru cunzedide
pronta liberalidade,
chi rezzat cun caridade
ogni tristu pedidore.
Amparendenos vivende
fizos de Adam mortales,
dae fantasmas bruttales
difendidenos morzende
a Lusbel esiliende
cudd'astutu tentadore.
Faghide chi cumparzamus
liberos de ogni vissiu
sa die de su giudissiu
ue a bois ispettamus
chi juttende bos sigamus
sa rughe 'e su Redentore.
Si esser bos consighimus
devotos interessados
tando de predestinados
unu segnale tenimus
et pro seguros vivimus
in bois amparadore.
Assisteds dimandamus
cuddas de su Purgatoriu,
chi disizant et pregamus,
et cun issas bos bidamus
in su Chelu cumprensore.
Deus Babbu laudadu,
Deus Fizu siat tantu,
Deus s'Ispiridu Santu
chi unu Micheli hat criadu,
pro esser sempr'invocadu
pro fidele interzessore.
Nos siedas protettore,
Michel'Arcangelu santu.

Tancas serradas a muru

Tancas serradas a muru,
fattas a s'afferra afferra,
si su chelu fit in terra
lu dizis serrare puru. . .

Troppu ingratu peccatore

Troppu ingratu peccatore
conosco d'esser istadu,
confesso ch'apo peccadu,
misericordia, Signore.
De su soliu et de su thronu
si reconnoschet ingratu,
pianghet David su ch'hat fattu
et cunsighit su perdonu
dae bois, Deus bonu,
de su committidu errore.
De Sichar in sa funtana
cun divina eloquenzia
reduezis a penitenzia
sa bella samaritana,
cambiendela dai vana
in candidu bellu fiore.
Si presentat penitente
Madalena peccadora:
est assolta in propri'hora
perdonada prontamente,
prosighende diligente
su piantu e i su dolore.
Ind'un'arvure mirezis
su publicanu Zaccheu,
si cunfessat d'esser reu
et bois lu perdonezis,
a su sinu lu torrezis
de sa grassia et de s'amore.
Tre boltas negadu istezis
dai Pedru, et disconnotu;
sinde pentit et de totu
Bois prontu l'assolvezis,
et prinzipe l'eligezis,
universale pastore.
Unu publicu ladrone
si convertit a sa morte
et puru hapesit sa sorte
d'ottenner salvassione
dende derettu et rejone
ad su duru peccadore.
Unu coro humiliadu
chi de veras est contrittu
David lassesit iscrittu
non det esser dispressiadu,
anzis meda aggrassiadu

de singulare favore.
Non miredas s'impiedade,
sa culpa mia, s'errore
ma usademi, Signore,
sa divina bonidade
dendemi un'eternidade
de gloria et de isplendore.
Dademi, Signore et Deu,
unu coro bonu et santu,
chi pianga tant'et tantu
chi nde burre ogni neu
dae custu coro feu
chi mi ponet in timore.
Dademi grassia cumplida
chi non pota pius torrare
a offender et peccare
in totu cantu sa vida,
et da poi cunsighida,
fua s'eternu rigore.

